

## «Nus lein trenar e dar giugs era las seras»

Il Club da ballapei Trun/Rabius mantegn treis piazzas da ballapei ellas vischnauncas Trun e Sumvitg. A Trun Pustget ei la piazza principala e sin quella vegnan era ils giugs da casa dai. Per puder trenar e dar giugs leu era las seras vul Trun/Rabius ussa realisar ina illuminaziun indirecta.

Susi Rothmund/FMR

Treis piazzas da ballapei ha il Club da ballapei Trun/Rabius – che dumbra rodund 180 commembers activs e passivs – a disposiziun. L’emprema equipa da Trun/Rabius dat ella tiarza ligia e la secunda ella tschunavla ligia, vitier vegnan las equipas dils juniors ch’ein da gronda impurtonza pigl avegnir. Dapi enzacons onns promovava la Surselva era il ballapei dallas dunnas ed el team Surselva dattan era enzacontas damas dil CB Trun/Rabius.

### Sulet ina piazza illuminada

Silla piazza a Rabius/Igniu vegn oravontut trenau ed era la piazza da ballapei veglia a Trun vegn praticamein mo druvada per trenaments. Silla piazza principala a Pustget vegn perencunter dau ils giugs da casa e quels attiran dabia aspectaturas ed aspectaturs. Era las damas dattan enqual giug a Trun/Pustget. Durent la stad survescha la piazza a Pustget plinavon per trenaments pils juniors ed activs. Fertion che la piazza da ballapei a Surrein/Igniu posseda ina illuminaziun, manca quella silla piazza principala a Trun. La piazza da ballapei veglia a Trun – che vegn sulet druvada per trenar – posseda bein ina illuminaziun provisoria, quella basta denton buc per far ils trenaments.

### Dapli trenaments a Trun

Perquei ei quella piazza strusch vegnida druvada ils davos onns. Aschia sa buca vegnir trenau las seras a Trun durent la primavera e gl’atun. «Ils davos onns havein nus constatau che la piazza a Rabius ei savens suroccupada ed enqualga ston duas entochen treis equipas parter il plaz la medema sera. Quella situaziun ei buca supportabla a liunga vesta. Il giavisch da saver dar giugs mo oravontut da saver trenar las seras a Trun ei semanifestaus adina dapli. Perquei ha la suprastonza dil Club da ballapei Trun/Rabius decidiu da lantschar il project per ina installaziun d’illuminaziun indirecta (Flutlicht) silla piazza a Pustget», declara il cassier dall’uniun, *Fabian Collenberg*. Ils juniors dalla Surselva treneschien empau dapertut e la finamira fussi era leu da saver trenar dapli a Trun, che schai ualti central.

### 180 000 francs per illuminar la piazza a Pustget

«Nossa finamira ei da saver realisar l’illuminaziun silla piazza da ballapei a Pustget sin questa stad. Dir formalmein gie al project sto denton la radunanza generala dils 17 da fevrer», di *Fabian Collenberg*. Sco il cassier dil CB Trun/Rabius declara, hagi in comite, ch’ei numnien il «comite cazzolas» denton gia surpriu la lavur. Leutier s’audi per exempel la tscherca da

donaturs e sponsurs e l'organisaziun d'occurenzas per aschia puder finanziar l'illuminaziun indirecta. Quell'ei calculada cun cuosts totals da rodund 180 000 francs. La vischnaunca da Trun hagi concediu ina contribuziun da 40 000 francs e quella da Sumvitg ina contribuziun da 18 000 francs. Ei hagian era dumandau igl Uffeci per la scola populara ed il sport per sustegn. «Nus havein la ferma speranza ch'ei detti leu ina contribuziun da rodund 20 % dils cuosts totals», aschia Fabian Collenberg. La finfinala restassen cuosts da rodund 90 000 tiel CB Trun/Rabius. «Quei ei ina gronda summa per noss'unium. Perquei essan nus dependents dil sustegn da donaturs e sponsurs.»

## Grond engaschi

Il Club da ballapei Trun/Rabius sesprova adina da mantener bein l'infrastructura ed ils commembers s'engaschan era cun lavur cumina. Aschia ha il «comite cazzolas» gia differentas ideas per rimnar daners e puder finanziar l'illuminaziun a Pustget. Tenor il cassier Fabian Collenberg mondien ei alla tscherca da sponsuras e sponsurs, pondereschien denton era da lantschar in'acziun da crowdfunding. En mira hagian ei era differentas occurenzas. Sco emprems prevesan ils giugadurs da ballapei d'organisar ina ustria a caschun dil tscheiver che ha liug ils 11 da fevrer 2023 a Trun. «Sche tut va bein, survegnin nus ina flotta localitad per quei intent e savein aschia far empau cassa», ha Fabian Collenberg buna speranza ed aschunta ch'ei sperien secapescha che massa amitgas ed amitgs dil ballapei e dil tscheiver vegnien quei di en lur bar per far in viva.